

**Date – 30/09/2025**

**Time - 07:30 -07:40Hrs**

**AKASHVANI AIZAWL**

**REGIONAL NEWS BULLETIN**

**HEADLINES (MORNING)**

- 1. Zirlawi Pawl ten kum 2023-2024 leh 2024-2025 financial year a scholarship la dawng lo zirlai zawng zawngte harsatna chungchanga hmalak ho an rel.
- 2. UD&PA Department chuan Aizawl-ah Lok Kalyan Mela an buatsaih mek.
- 3. India leh Bhutan te chuan ramri kana rel kawng pahnih siamna tur project an pawm
- 4. Union Minister for Commerce and Industry Piyush Goyal chuan European Free Trade Association (EFTA) ram pali te nena Free Trade Agreement an siam chu tunkar nilaini atangin hman a ni dawn a ti.

<><><>

**STUDENTS DEMAND SCHO DISBURSEMENT**

Mizo Zirlai Pawl (MZP), College SU Leader leh Mizoram University, Students' Council hruaitute chuan nimin khan MZP Pisapui ah Joint Meeting an nei a, kum 2023-2024 leh 2024-2025 financial year a scholarship la dawng lo zirlai zawng zawngte harsatna hrereng chung a hmalak ho an rel.

Zirlai hruaitute hian thuchhuah intawm siamin, tuna SNA SPARSH exemption October thla ral hma ngeia scholarship hi sem a nih theih nan hma la vat turin Central leh Mizoram sorkara mawhphurtu an ngen tih an sawi a ni.

<><><>

**GST-TAXATION**

Kumin August thla khan Mizoram sorkar chuan Taxation department kaltlangin chhiah chi hrang hrang cheng vbc 73 a hmu a, sorkar kum kal meka chhiah a hmuh tlem ber thla a ni.

GST atangin August thla vek hian cheng vbc 63 hmuh a ni a, kum 2 leh thla 5 chhunga GST atanga Mizoram sorkarin chhiah a hmuh tlem ber dawttu leh kumina GST atanga chhiah a hmuh tlem ber thla a ni bawk.

*Mizoramah kum 2023-24, 2024-25 leh, kumin 2025-26 kal mekah*

*hian sorkar chuan GST atangin chhiah engemaw zat a hmu tawh a; hemi kum 2 leh thla 5 chhung hian sorkar chuan GST a hmuh tlem lai ber chu September 2024 kha niin, cheng vbc 61 a hmu a ni. Kumin sorkar kum kal meka thla liamta August thla khan GST-ah hian cheng vbc 63 hmuh a ni a; hei hi hriat theih chinah kum 2 leh thla 5 chhunga GST atanga sorkarin chhiah a hmuh tlem ber dawttu a ni.*

Taxation department Monthly Achievement-in a tarlan danin, sorkar kum kal mekah April atanga August thla chhung khan kau hrang hrang atangin Mizoram sorkarin chhiah cheng vbc 568 a hmu a; a hmuh tam ber thla chu April thla kha niin, vbc 179 a hmu. Chhiah a tlem ber thla chu thla liamta August kha niin, vbc 73 hmuh a ni.

<><><>

GST REFORMS

Sorkar laipuiin GST chhiah a tih hniamna, GST 2.0 chu Lungleiah pawh zawm an tum chho mek zel a,

Kan corr in Dawr lian Company thil zuarte a a be kual a, Insakna bungraw zuar te pawhin a theih ang chen chenah an zawm a, Cement chi hrang hrang awm mahse a tlangpui thu in bag khat man a tlahniam a, Rs 650 ni thin kha Rs 620 ah te a tla thla a, Rs 500 vel a hralh turte pawh a awm a, bungraw lo thleng thar tur te pawh a man a tlawm tur a awm tih an sawi.

Hetihlai hian Essential Commodities lamah Agent ten GST thar angin man tihniamin Wholesale dawrah te Bill siam tawh mahse Dawr te nau zawkah chuan a man tihniam a la ni lova, mipuiin thil man tlawmin heng Amul Gold, ha nawhna hlo leh thil dang neuh neuh chu rate hlui ang tho khan an la lei a ni.

Sikret lamah erawh a manto a hralh ani thung a, Silk Cut bawm khar Rs 50 ni thin kha Rs 60 in vawiin khan zial zu tu pakhat chuan a lei tih a sawi a. Wholesale dawr neitu te chuan an thil zawrh tur ni 22 atang khan Bill an rawn tihniam a, mahse Agent thenkhat chuan an la tihhniam ve loh avangin, rate hlui an la hmang a, kan corr sawi danin, GST rate thar hi hrethiamlo an la tam avangin, GST chungchanga zawhna an dawnte chu ‘A buaithlak’ tiin an chhang mai a ni.

<><><>

UD& PA

UD&PA Department chuan nimin khan SBI Regional Business Office-ah Lok Kalyan Mela an buatsaih a, street vendor-ten awlsam zawka loan an lak theihna PM-SVANidhi loan chungchangah Aizawl khawpuia kawngsir leh khawlaia thil zuar-te pualin hun an hawng a; loan dilna first tranche 25, second tranche 15 leh third tranche panga, a vaiin dilna 55 chu online-in an upload sak a ni.

Lok Kalyan Mela-ah hian PM-SVANidhi scheme hnuaia loan la thar duhte dilna online-in an upload sak bakah, loan dil tawhte socio-economic profiling an tihpui a, digital payment la hmang lote chu a hman dan an zirtir nghal bawk a ni.

PM-SVANidhi scheme hi street vendor-te tana awlsam zawka loan lak theihna tura duan a ni a, Ministry of Housing & Urban Affairs leh Department of Financial Service-te enkawlina hnuaia kalpui a ni a, Mizoramah chuan UDPA department hi nodal department niin, district tinah kalpui a ni.

Lok Kalyan Mela vawiin leh naktuk hian Dawrpui Multipurpose committee room-ah neih chhonzawm tur a ni a, Mela zawh hnuah pawh loan dil duhte UDPA Directorate leh district tina UDPA office-ahte ngaihven theih a ni bawk.

<><><>

**MNF PR**

MNF National Core Committee member Pu Tawnluia Dy CM hlui chuan FCAA pawm chu Mizoram tan a tha lo a, an party chuan a pawm thei lo a, a do zel dawn a ti.

Nimina an party Office Mizo Hnam Run a thu a sawinaah Pu Tawnluia chuan MNF sorkar khan Assembly-ah Resolution pass-in Mizorama hman a remti lo a, a hnawl tawh a ti a. Lok Sabha Secretary General hnenah pawh August ni 28, 2023 khan hriattir nghal a ni a, chuvangin, he dan hi Mizoramah hman a ni lo," a ti a. ZPM sorkar-in he dan Mizorama hman tura an pawm ta hi a pawi tak zet a. Remna thuthlung zahlohna leh palzutna a ni a ti.

Pu Tawnluia chuan, "ZPM sorkar-in ram an hralh a, sorkar laipuiin an duhdan ang anga Mizoram hmang thei turin phalna a pe chu rem an ti thei lo, a ti a ni.

Mizo National Army, Army Chief hlui chuan, "Chief Minister in Dampa bial inthlan chungchang a sawinaah 'MNF kahhlum' tih tawngkamte a hmang thar leh tih sawiin, Thing leh raw innawhlaiin thil thleng tam tak a awm a. Remna leh muanna a lo awm a, phuba inlak tawna te awmzui lovin, mitin inrem takin an awm tlang a. Hetihlaia Remna vawng nung tur ber Chief Minister meuhin remna tichhe thei tawngkam a rawn hmang hi a pawi hle, a ti a ni.

(PR)

<><><>

**BJP MLA**

BJP MLA Pu K. Hrahmo chuan Dampa mipui mai bakah Mizoram Mipuiten milar thlan ringawt a fuh ber lo tih an hmu fiah tawh a ti.

Nimina BJP Office ah thusawiin Pu Hrahmo chuan Dampa Bial chungchang sawiin, ruling ZPM tan pawh tlin inbeisei ngawt chi a ni tawh lo a ti a, MNF Party chuan Pu Lalrintluanga Sailo an nei ta lova, candidate hran hlak a nih tawh dawn mai bakah SEDP sem a ni tawh dawn lova, chu bakah MNF an tling dawn tawh lo tih mipuiin an hriat tawh avangin MNF-ah mipuiin beiseina an nei tawh lo a ti a.

Congress Party chu Mizoram ah an hniam telh telh bawk avangin Dampa bial mipuiten Central ruling BJP candidate lam an hawi fur chuan BJP tan tlinna chance tha tak a ni, a ti a ni.

Dampa bial By Election neih hun tur hi puan la ni lo mahse, kil li atanga inbei turin Political Party 4- ZPM, MNF, Congress leh BJP chuan an candidate te puang tawhin, vote zawngin ngawrh takin an fehchhuak mek a ni.

<><><>

PARTY PR

Political Party pahnih, MNF leh PC Party chuan Chief Minister in duh duh dana rorel thei anga a insawi chu diklo an ti tih an sawi.

MNF National Core Committee member, Dy Chief Minister hlui Pu Tawnluia chuan, Chief Minister in rel pui an ngai lo, MLA 27 an nei a, ro an rel mai ang, tia a sawi chu pawia takzet a ni a ti a, Democracy ramah chuan mipuiin an duh an sawi ve a thianga ni a ti a. Chief Minister hi a lal tawh em em a ni, a ti bawk.

Hetihlai hian, PC Party Office Bearers Meeting chuan Chief Minister Pu Lalduhoma’n ZPM party office-a an duh duh dana rorel tura thlan tlin nia a insawi chu a diklo an ti a. An election Manifesto leh ram leh mipui tana tih tur an tiam te tipuitling tura thlan tlin an ni zawk tih hre turin an duh tih thuchhuah siamin an sawi a ni.

Democracy-ah chuan mipui hnenah tih tur tiam neiin ram rorelnaa thu tura thlang turin mipui ngen an ni thin a. Heta thlan tlin te chu an thutiam tihlawhtling tura thlan tlin an nih avangin sorkar hi an duh dan dana rorel tur ni lovin ram leh hnam tana tha tura an thutiam te tipuitling tura thlan tlin an ni an ti a, thuneihnaa hun reilo a awm chhung a, hemi theihnghilh a Chief Minister anihna chu a duh duha a hman theih emaw a ti ta mai chu a pawia takzet a, an thutiam te tipuitling tura chak taka hma la turin an ngen tih an sawi a ni.

(PR)

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

RAILWAY

India leh Bhutan te chuan ramri kana rel kawng pahnih siamna tur project an pawm. He rel kawng siam tur hi Bhutan nena inkalpawhna tur kawng pawimawh tak a ni dawn a. Union Railway Minister Ashwini Vaishnaw chuan heng project ah hian cheng vaibelchhe sang li leh 33 sen a ni dawn a ti a. Kokrajhar-Gelephu leh Banarhat-Samtse inkarah rel tlan tir a ni dawn tih sawin Bhutan khawpui pawimawh pahnih thlunzawm a ni ang a ti.

Nimin vek khan Union Railway Minister Ashwini Vaishnaw leh Bihar Deputy Chief Minister Samrat Choudhary te chuan rel service thar tur pasarih an hawng. An hawn zingah hian Amrit Bharat Express rel pathum an tel a. Heng relte hian Muzaffarpur leh Charlapalli inkarte, Darbhanga leh Madar Junction inkar leh Chhapra leh Anandvihar Terminal inkar an tlan dawn a ni.

(Newsonair)

<><><>

FTA

Union Minister for Commerce and Industry Piyush Goyal chuan European Free Trade Association (EFTA) ram pali te nena Free Trade Agreement an siam chu tunkar nilaini atangin hman a ni dawn a ti. Heng ram pali te hi Iceland, Liechtenstein, Norway leh Switzerland te an ni a. UP International Trade Show kharnaah he thu hi sawiin Pu Goyal a chuan ram changkang zawkten India nena sumdawnnaa inremna ziaak turin an phur hle tih a sawi a ni.

<><><>

SEVA PARV

Mipui rawngbawl leh sawrkar inrelbawl na tha thupuia neiin Prime Minister Narendra Modia hnuaiah ramchhungah hmasawna tam tak thlen mek a ni. Tun tum Seva Parv hunah chuan Modia sawrkarin zirna tihhmasawna tura hma alakna tarlang ila. Kum 11 kalta chhung khan PM Modia kaihhruai sawrkar hian thalaite tan zirna tha pe turin insiamthatna tam tak a kalpui a. Tunlai thiamna pekte, hna thawk thei tura chherte leh sum peipunna lama hlawhtling turin insiamthatna tam tak a nei a. NIPUN Bharat Mission te, PM SHRI Scheme, National Curriculum Framework leh National Credit Framework hmangtein hmalak a ni a. IIT,IIM leh AIIMS te tihchangtlun chhoh zel an ni bawk.

<><><>